



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 10

Party-i tamakok anguba junga asadangtsü nungdak: Sonia

Zverev-i Madrid Open tanabenbuba kokogo

VOL. XVIII NO. 206 (ADOK 206)

DIMAPUR

SANGTENNÜ (TUESDAY)

MONUPII (MAY) 11, 2021

₹ 5.00

## COVID-19 wara nung Pulse Oximeter ajanga teyari angur



**New Delhi, May 10, 2021 (Agencies):** India nung coronavirus wara tanabuba agi tonger timtemer aser anogoshia nisung meyirjang aika dak COVID-19 aliba puteta arur.

Iba ama mapang ka nung mongin nisungtemi nübortem dang Covid-19 nungi jenbua alitsü aser coronavirus agi shirangba yimya adokra doctor bushia oa teyari agitsü mepishia metetdaksür.

COVID-19 agi shiranger ajak dak adokba yimya kaji 'oxygen levels' ajema akümba lir aser iba ya mapang shitak nung reprangshim mesüra tamajungba akümer.

Pei temang nung 'oxygen levels' tendangtsü atema pulse oximeter amshir aser iba ajanga teyari tulu agütsür. Ajisüaka, nisung aikati iba oset amshiyim jungunga memeteti amshir.

Pulse oximeter ya kechi?

Pulse oximeter ta asüba ya teka agi amshiba oset tila ka lir aser iba nung temeyong ka juokba sülen second ishika

tsüngda temang nung oxygen saturation levels sayur. Anema alir nisung timbaka dak oxygen saturation levels 95% ser tema sayur.

Nisung kar temang nung timtem lira 95% dang nungi tajemba sayur. Oxygen saturation levels 92-93% tsüngda dang sayura doctor dang asüngdangyatsüla. Iba oset ajangasa temolungjang arakzüba sayur.

Pulse oximeter koma amshir?

Pulse oximeter nung temeyong juoka tendang dang temolungjang nungi talangtiba pilar aliba temang shilem dangi oxygen aoba bushir. Iba mapang azü nung aliba haemoglobin ajanga oxygen aliba asadanger temang nung oxygen aiba jenjang sayur.

Temang nung oxygen levels mapang shia tendanga metettsü atema pulse oximeter amshi junger aser oxygen level ajema akümdang tekaratiba nung medical teyari bushitsüla.

## COVID-19 Nagaland: Nisung 133 dak putet; 10 asü

**Kohima, May 10, 2021 (TYO):** Hombarnü Nagaland nung nisung 133 dak COVID-19 aliba putet aser parnok züngsema nisung ajak agi 16,283 kumogo. Külen, tanü COVID-19 agi shiranger nisung 10 asü aser parnok züngsema tasür ajak agi 150 kumogo.

"Tanü nisung 133 dak COVID-19 putet. Parnokji Dimapur nung 88, Kohima nung 13, Kiphire nung 9, Zunheboto nung 7,

Mokokchung nung 5, Peren nung 4, Mon o Tuensang nung asemsem (3) aser Wokha nung 1 lir" ta Health & Family Welfare Minister, Pangnyu Phom-i metetdaksü.

"Hombarnü COVID-19 puteta alir nisung 47 taneptsü nguogo. Parnokji Dimapur nung 38, Mokokchung o Wokha nung asemsem (3), Tuensang nung 2 aser Peren nung 1 lir" ta Minister Pangnyu-isa ashi.

Nisung 16,283 rongnungi

12,734 taneptsü nguogo aser tang nisung 2,884 anepaludar, ta paisa metetdaksü.

Nagaland nung COVID-19 nungi taneptsü angurji 78.2% lir. Tanü nisung 10 asüba züngsema tasür ajak agi 150 kumogo, saka tasürtem rongnung nisung 10 bo tanga tashidak ajanga asü, ta Minister-isa ashi.

Nagaland nung COVID-19 puteter nisung 515 tashi tanga state temi ogo, ta paisa shisem.

## Himanta-i anir Assam Cabinet minister temi tezüngzüktep agiogo

**Guwahati, May 10, 2021 (Agencies):** Mongulbarnü Assam chief minister Himanta Biswa Sarma-i anir Cabinet minister 13-i tezüngzüktep agiogo.

Guwahati nung aliba Srimanta Sankardeva Kalakshetra nung tanü Himanta Biswa Sarma-i Assam nung chief minister 15 buba inyaktsü atema tezüngzüktep agi.

Pa dak alia Bharatiya Janata Party (BJP), Asom Gana Party (AGP) aser United People's Party Liberal (UPPL) nungi Minister 13-ia tezüngzüktep agiogo.

Tanü anüngdang 12.05 ako nungi iba sentong tenzük aser Assam Governor Prof Jagdish Mukhi-i parnok nem tezüngzüktep agidaktsü.

Himanta-i mezüng tezüngzüktep agiba sülen Assam BJP president Ranjeet Kumar Dass-i minister indang tezüngzüktep agia liasü.

Maneni, Asom Gana Parishad (AGP) president Atul Bora, Chandramohan Patowari,

Keshab Mahanta, Dr Ranoj Pegu, Sanjay Kishan, Ajanta Neog, Pijush Hazarika, Jogen Mahan. Bimal Bora, United People's Party Liberal (UPPL) tenzük UG Brahma, Parimal Suklabaidya aser Dhekiajuli MLA Ashok Singhal nungertemia Cabinet minister inyaktsü atema tezüngzüktep agi.

Chief Minister inyaktsü atema tezüngzüktep agiba sülen Sarma-i ashiba agi sorkar tasenba atema mezüng teinyaktsüji Assam nung Covid wara azüoktsüba lir.

Mongulbarnü State Cabinet indang senden mezüngbuba amentsü aser iba sülen Covid dak sendakba teinyaktsü tasen kar metetdaksütsü, ta Sarma-isa ashi.

"Ozü sorkari Assam ya azükaru jenjang temabai ajungkettsü nangzükter aser linük nung state tajungtibatem den adentsü" ta paisa osangbener dang ashi.

"Assam nung Covid tensa kanga mejungi kumogo. Anogoshia nisung 5,000 tema dak Covid aliba puteta arur. Anungji, asüng cabinet senden nung onoki Covid atema jembitsü. Onoki iba wara azüoktsü atema nungdakba

teinyaktsü ajak inyaktsü" ta Sarma-isa ashi.

BJP-i election manifesto nung nangzükba ama mapa ajak inyaktsü. Election nung nangzükba tu odang masü saka mapa küma inyaktsü atema nangzükba lir, ta paisa shisem.

"2019 kum Assam nung National Register of Citizens (NRC) adokba ozü sorkari meyipa reprangshimtsü. Onoki border district ajak nung NRC mapa küma inyaknür aser tanga district tem nung 20% tenüng zülüokba jangjashinür" ta Chief Minister Sarma-isa metetdaksü.

"NRC nung ajak shitak ta kulitem bushitetra state sorkari NRC agizüktsü aser tarutsü teinyaktsütem inyaktsü. Ajisüaka, metokmeperi alibatem bushitetra reprangshimtsü atema Supreme Court dangi abentsü" ta paisa ashi.

Chief Minister Sarma-isa United Liberation Front of Assam (ULFA-I) Paresh Baruah dena telungpur teloktem dang ozüng alema inyakba toktsür temai adoktsü atema mepishia metetdaksü.

"Nisung tepsetba aser pur aoba ajanga khurettem mekokteter saka tamajungba kümdaktsür" ta paisa ashi.

## MU-i COVID-19 ajanga tsürabur asüba kaketshirtem angati züngdaktsütsü

**Shillong, May 10, 2021 (Agencies):** COVID-19 ajanga higher education kaketshirtem timtem ajuruba yaritsü atema Meghalaya nung Mahatma Gandhi University-i coronavirus ajanga tsürabur taküm samaba kaketshirtem angati züngdaktsütsü telemtetba agiogo.

"Kaketshir tsürabur aika COVID-19 ajanga taküm samaogo aser iba ajanga parnok (kaketshir) shisaluyimba angazüktsüba nung timtem aika

ajurur. Anungji, meimchir asoshi aria bilemetsüba tangatetba nung University ketdangsurtemi item amala kaketshirtem angati züngdaktsütsü telemtetba agiogo" ta Mahatma Gandhi University Vice-Chancellor, Rajan Chopra-i ashi.

"Kaketshirtemi University nung BA, MA, B. Pharm, D Pharm, Law, MLT, DMLT, BPT, MPT course tem agitsü atema tenüng agütsütettsü aser angati zünga otettsü" ta Chopra-isa ashi.

Excel Book Publication House-i item kaketshirtem nem management, IT aser technical courses indang kakettem angati agütsütsü telemtetba agiogo, ta vice-chancellor-isa ashi.

University ketdangsurtemi angati züngdaktsüba den kaket angati agütsütsü. Anungji agüja aliba number ajanga tongteprateptsü akok, ta paisa shisem. +91 70850 59358 +91 70850 59839

Email: info@mgu.edu.in

## CBSE-i Class 10 marks upload asütsü metetdaksür

**New Delhi, May 10, 2021 (Agencies):** Class 10 kaketshirtemi marks anguba upload asütsü atema Central Board of Secondary Education (CBSE)-i link ka lapokogo.

Class 10 tatidang athiba ajanga school temi dang kaketshirtem asadanga marks agütsütsü. Subject shia atema kaketshir nem internal

assessment atema 20 marks aser CBSE-i inakyim tasen latettsüba nung ajemdaker 80 marks agütsütsü.

June 11, 2021 tashi nung school ajaki marks upload asütsü atema CBSE-i tetuyuba agütsüogo.

"School temi test aser exams balala agiba nung ajemdaker 80 marks nungi marks agütsütsü. Taoba mapang class 10 board

exams nung agütsüba ama marks agütsütsüla. Kaketshirtem periodic, half-yearly, or mid-term exams aser pre-boards nung ajemdaker asadangtsü. June 20, 2021 nü results sangoktsütsü" ta CBSE-isa metetdaksüogo.

CBSE school shia nung result committee ka tentettsü aser iba nung principal aser tesayur 7 züngsemsüla.

## ONGC nung mapa inyaker tasembuba ULFA-I ket nung lir

**Guwahati, May 10, 2021 (Agencies):** ULFA-I-i pur aoba ONGC nung mapa inyaker Ritul Saikia ULFA-I ket nung lir ta temai adokba telungpur kati shiogo.

"The cadre also revealed that in all probability, the third kidnapped ONGC personnel, Mr Ritul Saikia is with ULFA-I," a statement from the defence read.

"Temai adokba telungpuri Ritul Saikia ULFA-I ket nung aliba kuli agütsüogo" ta Hombarnü Defence sangdong ka nung metetdaksü.

April 21, 2021 nü ULFA(I) züngsemtemi Sivasagar district kübok Lakwa nung ONGC nung mapa inyaker 3 pur ao.

Par asem rongnungi Mohini Mohan Gogoi aser Alakesh Saikia na kümzükogo. Ajisüaka, Ritul Das ya tang tashi ULFA-I ket nung lir.

Külen, ULFA-I-ibo ONGC nung mapa inyaker nisung asemprong Nagaland kübok Mon district nung yutsü ta ashir.

May 8, 2021 nü India-Myanmar arrtsü anasa Nagaland kübok Mon district nung ULFA-I züngsem ka Assam Rifles tsüngdang temai adoka liasü.

IGAR (North) indang Tuensang Battalion-i telungpurtem dang temai adoktsü atema kanga meranga ajungshia aruba ajanga pa temai adok ta AR sangdong ka nung metetdaksü.



## COVID-19 mechi state nung ki aika shibangtsür

**Dimapur, Monupii/May 10 (TYO):** State nung COVID-19 tashidak anogoshi tali jateta aoba mapang district balala nung iba tashidak azüoktsü mechi ki-o-jen shibangtsüba osangtem lir.

COVID-19 tashidak prokshia aoba nungi jenbutsi asoshi tapet meratem agitsü atema Dimapur district administration ajanga Dimapur nung office ana ghonda 48 atema shibangtsü totuyuba agütsü, aser iba mapang ketdangsurtemi mürekmeju mapatem inyaksü.

Shibangtsüba office ana ya PWD Road nung aliba ICICI Bank, Dhobinala branch aser Development Authority of Nagaland alitsü.

Kasa mapang Deputy Commissioner, Dimapur, Rajesh Soundararajan-i Kushiaibill yimdam Asür Samir Mech'er ki lapoktsütsü totuyuba agütsüo.

Sorkar totuyuba nung aliba

ama iba ki mürekogo aser mera ajak agia lir, ta sangdong ajanga ashi.

Deputy Commissioner, Mon, Thavaseelan K, IAS ajanga May 8, 2021 nü sangdong ka nung Statistics Office, Mon Town anasa ki ka shibangtsü totuyuba agüja liasü.

COVID-19 tashidak nungi jenbua alitsü meratem tajungtuba nung agitetsü atema House No. 223 shibangtsür, ta sangdong ajanga ashi.

Iba totuyuba nung aibelener kar danga lira, Disaster Management Act 2005 indang Section 51 nungi 60 aser Indian Penal Code indang Section 188 nung mela aliba ama temerenshi alitsü, ta sangdong ajanga ashi.

Additional Deputy Commissioner, Naginimora, Vineet Kumar, IAS ajanga May 10, 2021 nü sangdong ka nung, COVID-19 tashidak prokshia aoba nungi jenbua alitsü atema mera balala agitsü asoshi

Primary Health Centre, Ward No. 09, Naginimora ya ghonda 48 atema shibanga atar, ta metetdaksü.

Iba totuyuba nung aibelener tem ozüing agi melaba ama merenshitsu, ta sangdong ajangasa ashi.

Wokha nunga COVID-19 positive jangjatetba mechi aser nüburttem kumzuka ayutsü nükjidong nung, Deputy Commissioner, Wokha ajanga Wokha nung National Highway 61 tsünglanglen Etsuchukha Colony nung ki ka (House No. 112) shibangtsür, ta metetdaksü. Iba ki ya May 10, 2021 nü nungi tarutsü nung sangdong ka magütsü tashi shibanga atatsü, ta ashi.

Iba totuyuba nung aibelener nem Disaster Management Act 2005 indang Section 51 nungi 60 nung aliba ama aser Indian Penal Code indang Section 188 kübok tapet temerenshi agütsütsü, ta sangdong ajanga ashi.

## Kiphire nung dokan ajunga ghonda 72 shibangtsü

**Dimapur, Monupii/May 10 (TYO):** Kiphire nung COVID-19 tashidak tali putetba mechi, District Task Forces, Kiphire ajanga May 11, 2021 nungi tenzuka district nung aliba dokan ajak ghonda 72 atema shibangtsü telemtetba agiogo.

Deputy Commissioner, T. Wati Aier-i sangdong ka nung ashiba agi, district nung COVID-19 positive cases pezü dang liasü, saka tapi agi

tendanga aoba mapang nisung teku dak putet.

Iba tashidak den frontline worker kisüingi merarartetsü saka nüburttem ajunga teyari nungdaker, ta Deputy Commissioner-isa ashi.

Iba senden nungsa Kiphire aser Pungro nung COVID Care Centre aser institutional quarantine centre tem activate süshitsu, Anatongre, Longmatra aser Yangzitong lemjem nung screening centre

amenoktsü lemtet.

Danga district tem nungi osettsüset bener aruba gari tulutem oset agizüktsü atema ghonda 12 dang melatsü aser Kiphire jila nung anenzüktsü memelar.

Kiphire nung oxygen plant amenoktsü atema osettsüset tem district tonga bener aruogo aser iba plant nung mapa inyak tenzüksü ita ka agitsü, ta sangdong ajanga ashi.

## COVID 19 : Tuensang DTF senden agiogo



**Tuensang, Monupii/May 10, 2021 (TYO):** Hombarnü (10.05.2021) DC conference hall nung DC aser Chairman DTF Tuensang, Kumar IAS-i anir Tuensang District Task Force for COVID 19 senden ka ayonga agiogo.

Iba senden nung DC aser Chairman DTF-i, Tuensang Town Baptist Churches Union ajanga Tuensang jila telungtet nung lokti senden/sentong kecha ayonga magitsü atema bangjemtetba indang telok dang metetdakja liasü.

Iba dak sendakba nung, DC-i, iba tashidak prokba azüoktsü asoshi tanga lokti tentettem dang kasa asalentong yanglua aser item temzüng nung anidaksü asoshi mepishigo.

Ramnikant-i, yimtsüng tem

nung iba wara matongtsü asoshi nüburttem yimtsüng nungi jila tashi senzüsebongba junga mittsü atema District indang Village Council ajak dangi tezüluba ajanga osang agütsütsü, ta metetdaksü.

Tanga District balala nungi arurtem junga mittsü aser iba atema check gate nung tarurtem (returnees) indang data bendentsü aser kasa inyakimji pusema medical den ward union ajaki nungita yaritsü asoshi teloki lemtetogo.

SOP tali akangshitsu asoshi, jila nung nüburttem/lijaliyonger tali adenshiba paidoktsüsa, mapang tatsüka atema nungdakba osettsüset/chiyongtsü lijaliyongtsü asoshi card system tenzüktsü aser ajia kibong ka nungi züngsem ka dang melatsü asoshi telok

olemtepa liasü.

Iba den külemi jila telungtet nung Covid-19 wara prokba azüoktsü asoshi jila nung saisapong tesem (playground) shibangtsü asoshi telok lemtetogo.

District nung Covid-19 tensa mejungi küma aotsü kümra, Government Polytechnic Setam aser Sao Chang Government College hostel anaprongla hospital ama amshitsu atema züngsemtemi asadangshia jembiogo.

Maneni, COVID dak sendakba maparen achaayangtsü atema Tuensang district call center lapktsüogo aser nüburttem ph no. 03861220171 aser 8787655927 nung tongteprateptsü akok, ta kasa sangdong ajanga metetdaksü.

## Dy. CM Y. Patton-i Himanta Biswa Sarma nem tenüngsang agütsü

**Dimapur, Monupii/May 10 (TYO):** NEDA Convenor aser BJP nung takotet nübu, Dr. Himanta Biswa Sarma, shiba Assam indang Chief Minister 15buba kumogo, pa nem Nagaland Deputy Chief Minister aser BLP leader Y. Patton-i tenüngsang agüja liasü.

Assam nung BJP sorkar kümsük ana tashi aruba ya Sarma mapa lir, aser iba yongji Northeast region aser National jenjang nung pa tenüng tetshia nüburttemi

meteta akum, ta Patton-i ashi.

Pa lenisüba kübok Assam ajungalen terenlok alitsü aser tesunep aser yimchiyimjung atema danga Northeast state tem den tesendaktep tali tashi itshitsu tamang teimla lir, ta pai ashi.

State BJP legislator tem tenüng nung Sarma nem tenüngsang agütsü aser takokma nung pa indang kümsük aniangma, ta Dy. CM, Y. Patton ajangasa ashi.

## Kohima DC ajanga metetdaksür

**Kohima, Monupii/May 10, 2021 (TYO):** Deputy Commissioner, Kohima Gregory Thejawelie-i sangdong ka ajanga, tekübokken agüja aliba mobile number tem Kohima District Task Force indang helpline No. ama amshitsu, ta metetdaksü.

1. 6033833879  
2. 9362705742  
Anungji, COVID-19 dak sendakba ajak asüngdangyatsü atema Kohima District indang tekalen agüja aliba ph no. ana ya teti (24x7) lapoka alitsü, ta kasa sangdong nung shia lir.

## NSCN (R) ajanga asükhu lemsateper

**Dimapur, Monupii/May 10 (TYO):** NSCN (Reformation) ajanga sangdong ka nung, anojungi ajungbena May 03, 2021 nü Hetoi Kiba asüba atema tejashi lemsateper, ta ashi.

Asür Hetoi ya Xelhozhe Village nung alir ka liasü aser UT-1 kübok Leacy ka ama inyaka liasü.

Pa asüba ajanga asenok asoshi nendaka agütsür tenzükba ajemalu züngsem ka

samaogo, aser iba yongji ozü molung ayanger, ta sangdong ajanga ashi.

Pa tanüla teti tatem maka tesunep nung anisüngzükjang aser mangyimer kibong nem tashi tasen aser molungzüngzük agüjang ta Tsüngrem dang sarasademer, ta NSCN/GPRN (Reformation) indang MIP (Ministry of Information & Publicity) ajanga sangdong nung shia lir.

## NPP Nagaland State Unit ajanga asükhu lemsateper

**Dimapur, Monupii/May 10 (TYO):** NPP Nagaland State Unit ajanga L. Aghoto Yeptho asüba atema kinunger aser tembartem den asükhu lemsateper, ta NPP State Unit indang tongti zülur (Organization), Limanuksung-i sangdong ka ajanga ashi.

Küm 100 lir asüsang Aghoto Yeptho ya NPP State tir, Andrew Aghoto Sema aser NECC NPP vice-chairman, Ato Yepthomi na tebu lir, ta sangdong ajanga ashi.

Jenang balala nung pai lokti asoshi shilem tajung agiogo. Pa ya Bhimo village, Zunheboto indang Head GB liasü aser Agri Officer nung mapa nungi anisüngzükba liasü.

Asür Aghoto Yeptho ya telungjem nung tamak akar ka liasü, shiba dak shisatsü aser nükla tajung liasü aser terenlok atema tasü ita nokdaker ka liasü. Tarutsü putu tajungba kumdaksütsü mechi pai bendanga agütsür apu yanglu aser yamaji pai nüburttem molung nung kongshia liasü, ta ashi.

Pai ajemalu, tongmelang aser bendanga agütsüba yimyattem asenok dang sayuogo, koba asenoki teti bilemtetsü.

NPP nung züngsem ajungai mangyimer kobong asoshi sarasademtsür. Asür tanüla teti tatem maka tesunep nung anisüngzükjangma, ta sangdong ajangasa ashi.

## PDBA-i Asür Nechochiyi mang ayimer

**Dimapur, Monupii/May 10 (TYO):** Faith Hospital Dimapur nung tanep ajungbena Nechochiyi S. Venuh, Retd Principal District & Sessions Judge, Nagaland asüba asoshi aoksar aser mang ayimer, ta Phek District Bar Association (PDBA) ajanga May 10, 2021 nü sangdong ka nung ashi.

Pa ya May 1, 2021 nü nungi 'strok' agi timtema arua liasü, ta PDBA tor Povotso Lohe-i sangdong ka nung shia liasü.

Pa iba lima nungi pilaba ajanga asenok asoshi nübu tajung, Nagaland aser talisa district nung tzüzung-ozüng meteter takotet nübu ka samaogo aser pa asüba ajanga tawa adokba asüngtsü kanga tasak alitsü, ta Lohe-isa ashi.

Kinunger aser adianurtem mangyim tia nung aliba mapang tulusang Tsüngremi parnok nem tesunep aser tashi tasen agüjang ta sarasademtsür, ta paisa ashi.





Deobarnü HQ IGAR (south) kübok Mantripukhri Battalion aser Manipur police yaritepa Imphal West district kübok Samurou tesem mita aodang prangpong-injang aika ngutetogo. Osang tejangja ka angazükba sülen parnoki Samurou nung mobile vehicles check post ka mendanga atadang pistol 4, PEK plastic explosives, rifle balala indang injang aser radio set 3 ngutet.

## Mizoram nung nisung 73 dak Covid-19 putet

**Aizawl, May 10, 2021 (Agencies):** Hombarnü Mizoram nung sample 904 tendangba nungi sample 73 nung Covid-19 aliba putet.

Tashidak tasen puteter densema Mizoram nung Covid19 puteter ajak agi nisung 7,623 kümogo.

Tanü Mizoram nung iba wara ajanga nisung ka asü iba nisung züingsema tasür ajak agi 21 kümogo ta ktdangsür kati metetdaksü.

Election duty temer sülen West Bengal nungi aruba police asem, healthcare worker ka aser tanur 19 dak Covid-19 aliba putetogo.

Tashidak tasen puteter 73 rongnung Aizawl district nungi 54, Siaha district -8, Lawngtlai

district -4, Lunglei district - 1 aser Kolasib, Serchhip den Khawzawl district nungi nisung anana dena lir.

Nisung 8 tashi ainlen senzüba record lir aser nisung 65 tashi pei aliba tesem nungi iba tashidak mena, ta ktdangsüri ashi.

Parnok 73 rongnung, nisung 41 tashi iba wara temaitsü agi shirangdar.

Hombarnü, Aizawl anasa Zoram Medical College (ZMC) nung Kanan Veng nungi arishi küm 68 tain tetsür ka iba tashidak agi süogo.

ZMC nung medical officer kati ashiba agi, April 21, 2021 nü tetsür la dak Covid19 tashidak putet aser April 23 nü la medical college-i anir aru.

Hombar anepongi 5:00 ako meta la Covid19 Pneumonia agi asü, ta pai ashi.

Tang, Mizoram nung nisung 1,847 shi iba tashidak agi shirangdar aser nisung 5,755 tashi Covid-19 care centre balala nungi taneptsü ngur yokadokogo.

Nisung 172 iba wara nungi taneptsü anguba sülen, Deobarnü Covid19 Care Centre balala nungi parnok yokadokogo.

Deobar aser Hombar ghonda 16 tsüingda state nung nisung 4 tashi Covid-19 agi süogo.

Ano külen, State nung iba wara adoker külen nungi sample 3,29,805 tashi tendangogo.

## Samir K Sinha, Principal Secretary shimogo

**Guwahati, May 10, 2021 (Agencies):** Hombarnü Assam nung 15 buba chief minister inyaksü atema tezüingzüktep sülen Himanta Biswa Sarma-i IAS ktdangsür tejen Samir K Sinha principal secretary to CM inyaksü shimogo.

1994 batch IAS ktdangsür Sinha ya Department of health

and family welfare nung principal secretary inyaka liasü. Pai IAS ktdangsür Paban Borthakur melenzükpogo.

Borthakur ya 1989 batch IAS ktdangsür ka lir aser pa ya taoba chief minister Sarbananda Sonowal den yariteper tajung ka lir.

Borthakur ya Cultural af-

fairs department nung additional chief secretary inyaksü mapa melentsüogo.

Kasa mapang, Sinha ya additional charge of principal secretary to health & family welfare department aser transformation & development department nungi anenogo, ta Hombarnü sorkar sangdong ka ajanga metetdaksü.

## Hr. Secondary 1st year exam athir

**Guwahati, May 10, 2021 (Agencies):** Assam nung AHSEC (Assam Higher Secondary Education Council) kübok Higher Secondary indang first-year tatidangtem thiogo.

Tatidang athiba den külemi Higher Secondary indang first year kaketshir ajak second year-i ajungkettüsü.

Hombarnü Assam Higher Secondary Education Council (AHSEC)-i iba osang metetdaksü.

Assam nung COVID-19 tensa mejungi aoba asadangteta Higher Secondary indang tatidangtem athitsü atema board-i telemtetba agia liasü.

Higher Secondary first-year kaketshirtem indang tatidang ya May 4 nungi agitsü renema liasü saka taoba mapang iba tatidang atema anogo melenshia liasü.

Ajisüaka, Assam nung

COVID-19 kanga putetba nung rangloker AHSEC-i Higher Secondary tatidang athitsü telemtetba agi.

"Alima ajunga asüingba COVID-19 wara ajanga tensa mejungi aoba atema, 04/05/2021 anogo nungi tenzuka agitsü renemer aliba Higher Secondary First Year Examinations 2021, koba anogo atsülangja liasü, iba tatidang magitsü aser kaketshirtem shirnoki iba tatidang atema online ajanga application agitsüogo, parnok ajak academic session 2021-2022 atema Higher Secondary 2nd year class-i ajungkettüsü" ta AHSEC-i metetdaksü.

Tang, Assam nung COVID-19 tensa kanga mejungi kümogo.

Hombarnü Assam nung Covid-19 ajanga nisung 48 asü aser nisung 3,299 dak tashidak tasen putetba osang ajanga angazükogo.

## Social worker Lukie alima nungi pilaogo



**Guwahati, May 10, 2021 (Agencies):** Assam nungi Social worker Lukie Choudhuri, Deobarnü Gurugram nung asü. Lukie ya arishi küm 81 tain liasü.

Lukie Choudhuri-i lar jabaso Sanjay Choudhuri, jala Neeta Kashyap, lar jala kinungbo -Siddharth Kashyap, lar jabaso kinungtsü - Monideepa Choudhuri aser semchir Miraya Kashyap

nunger toktsür alima nungi pilaogo.

Choudhuri ya 1939 küm aso aser la ya Guwahati nungi lir. Lai asür Kirananda Choudhuri den kibong aküm aser la ya Rai Bahadur Manik Chandra Baruah'er semchir liasü.

Lai ajak den jungtepa aser ochishia ali. Kolkata nung alidang lai lokti maparen balala nung inyaka liasü.

## COVID-19 ajanga ADC election thinener

**Imphal, May 10, 2021 (Agencies):** Manipur sorkari Hombarnü Autonomous District Council (ADC) election mapang atsülangba osang metetdaksüogo.

Shitakba agibo ADC election ya May 5, 2021 matongdang agitsüba liasü saka state nung COVID-19 tensa mejungi akümba ajanga atsülangtsüsa akümer.

"COVID tensa ajanga containment measures benoka lir aser iba jagi sorkar office ajak containment zones ta sorkari sangdongogo. Anungji jembitepa aliba ama sorkari ADC election indang anogo

meshimteter" ta Additional Chief Secretary (TA&H), Letkhogin Haokip-i metetdaksü.

April 7, 2021 nü Manipur sorkari aser All Tribal Student Union Manipur (ATSUM) tsüingda May 5, 2021 matongdangsa ADC election agitsü molungtepa liasü.

June 25, 2021 tashi nung ADC election maparen tembangtsü atema parnoki iba telemtetba agia liasü.

Sorkari tekaratiba nung ADC election agitsü atema bilemer aser mapa inyakdar ta Additional Chief Secretary (TA&H)-isa metetdaksü.



Indian Medical Association-Arunachal Pradesh (IMA-AP)-i lungkak aitiba anenogo. Taoba Hombarnü Naharlagun nung aliba Samaritan Hormin Hospital nung doctor ka dak teka sangshiba aser osettsüet raksatsüba anema IMA-AP aser APDA züingsemtemi anogo ananü lungkak aittsü ayongzuka liasü aser Arunachal Pradesh health minister-i mapa inyaksü nangzükba sülen parnoki lungkak aitiba anenogo. (Itanagar, May 10)





# TIR YIMYIM

## YIMOBILEM (EDITORIAL)

DIMAPUR SANGTENNÜ, MONUPII (MAY) 11, 2021

### Covid mapang kechi inyaksü ?

Covid-19 ya kanga tetsübutü tashidak wara lir, anungji tashidak menatepa ao tsübuba agi akok tashi nisung ajak tangaleni moi kidang amongtsü aser lokti senden malitsü asoshi yimteni ozüng agüja lir. Iba ozüng sülenji ajaki tashi angaa anidaksü merangdagi. Iba ama kechalenia moi kidang amongba mapang ya, ano tebilemsü kaji, kechi inyaksü (?) ta asüba tebilemsü ya ka asütsü. Nisung ya kidang dang monga chiyongli mejangli ta asüba shiruru masü saka tarutsü indang bilema shisaboluba agi kidang anisüngzüka memongtet anibelega inyakba taküm lir. Atangji, nisung mulung animesüngzüktet shisabolua bilembaji pei asoshi dang masü saka pei kolok aser pei shisatsü agi atongba yari, pei kinunger, pei kiyonger, pei nübertem aser alima nung alir ajunga atema bilemer. Iba ama nüngdaktem repringteta khuretsa bilemba agi, tanü asenoki amshiba osettsüset aser chia-ajemba chiyongtsütem ajak ya nisungtemi yanglutetbatem lir. Aji oda, asenok rongnunga taoba küma kasa tashidak wara agi kechalenia mouteti mokdangerr kidang amongba mapang, nisung aikati atsü (gardening) aser alu mapa inyaka aonsutsü kanga junga züsentepta otsü lir. Ano, aikati kidang ak aser an tajungba metsütsü angazükogo. Ano, kidang kibong nung chirnurtem aikati tsüraburtem dang nungi angazükba dang masü saka internet ajanga Youtube ama nungi soruchioktsü aser amtsük-amsang tapu balala yanglutsü angazükba agi, tangbo kidang parnoki kanga junga soruchioker aser parnok rongnung karibo hotel lapoka shishilembatsü mapa tenzükogo. Ano, tang ama tangaleni oa mapa inyak majung kidang mongtepta mapang ya nisung aika asoshi kakat azüngtsü aser zülutsü mapang tajung lir. Iba jagi nisung karibo lockdown mapang züluba kakat sayaba asenoki nguogo. Item amaji kechi koma mapang ka südir süaka, mapangji senti ta meteta asenok nisung shiai amajok nung anogo kata mesüidaksütsü merangtsübaji kanga tongtibang lir. Tashidak nungi kumzütsü asoshi kechalenia moi kidang amongyonga asenok arishi anogobo akhi ama süitemer aser asen taküm arishi tatsüba akümer, anungji lockdown liang teli, kidang mongang temong, asenok kecha meinyaki odang kazütsübajibo mapang mali ta asenok ajaki meteta, asen asoshi dang masü saka tangar dena ajangzüksüsa anogo shia mapa tilakabosa bilemteta inyaksübaji kanga tongtibang asütsü. Aji oda, asenok kidang nüngdakba ajak peria akatsüa akok saka asenoki makaba pur kar danga repringteta, parnok denji asen akaba lemsateptsü mapang tajungtibaji tang ya lir. Ibai asenok ajak asoshi tebang agi jembia arubatem aika mapa küma inyaksüba mapang lir, kechiyong tasü ait mait, temeim ali maliji, mapang tajung nungbo mejangjatsü saka tang ama mapang tamajung nung jangjatsü. Aji oda, kija kibong asütsüa akok mesüra yimten, arogo aser lokti tentettem asütsüa akok, nisung yarinertem atemabo tang ama ya temeim mapa inyaksü mapang tajung lir, anungji tesem kar nung danga asenoki nüngdak ka agütsütetsüsa repringteta, memenu dangsa jet ta yariptsü renema alitsüla. Tanüla tsütsüa Tsüngrem den jembia tesendaktep yanglushitsü aser Tsüngrem o angatetsü aser angatdaksütsü merangtsüba mapang tajungji tang ya lir. Atangji, tejangrar asünungji, amangba purtem aikati lokti sentepbosa methiner, ajia shitak saka yimten ozüng anema arogoi inyaksübajia tasak, kechiyong yimten nung yimsüsür aser ketdangsertemjia tamanger tajung kaka lir aser parnoki inyakba ya tamangba yimsü anemer masü saka asenok ajak tashidak wara nungi taküm kumzüka alitsü asoshi inyaker. Ibaji kodang angateta asenoki Tsüngrem külemba aser Pa o angatetsü merangba mapa nung tali temulung agüja inyaksü merangdir, tanüla nung tangsa tashi taitba aser Tsüngrem o a tangsa tangatetba ta tamang nung aientsüba mapangji tang yasa tajungba ta angateta inyak tenzüksü. . Ano, tanü putu yabo nübo aser mapang endoka maoyonga kidang nungi ajak angar aser angur, iba jagi asenok tenla kidang adenshia sentep agidangbo nisung ishika dang arua angar, saka tangbo internet ajanga online nung sentep agiba agi, akhidang sentepi marurtemi dena angar. Aji oda, akhidang tenla kidang nisung meyi ka arua angaba to tangbo meyerijang teri angar. Iba maangka aser temoatsü mapangji repringteta, tang mapangba ya Tsüngrem tenzükur laishir tajungtemi Youtube channel lapoka yur online nung anogo shia minute metsü-semerka danga agia Bible Study sentong tenzükra, iba jagibo akhi mapang nung sentepi marurtem dena temoatsü angutsü aser kodang tanaben tenla ki lapoka sentep agi tenzükdir, idangjibo akhidang marurtema aika arua angutsü. Laishiba azüngba (Bible Reading) aser Lai bushiba (Bible Study) na kenyongi balala lir, kechiyong nisung kati Laishibabo ajunga züngmatsü akok saka tekong kata mangatetsüa akok. Tanü asenok amangba purtem asoshi nüngdakbaji Lai sayur nüngdaker. Aji oda, tang ama mapang ya Laishirtem asoshi teinyaksü tongtibangtibaji online nung Lai sayuba sentong tenzüksübaji asütsü. Ibaji aonung shia kidang kinungertem ajak külemi mener angatsü koda tajung asütsü. Kodang asenoki Laishiba sayutsü aser angatetsü tenzükdir, Tsüngrem o bushitsü aser angatetsü tali tali jangratsü aser alima inyakyim ajak parnoksa tajungba küma melenshia aoba angutsü.

# OLEMSABANG

## Tanü Ao oshi merenlokba tera

~ Esther (www.Nokinketer.com)

Alima nung kodang kin ka ta südir yangji oshi, sobaliba, tamangba yimsü aser iba nübur libaliru yimya ajak densema lir. Aser item jagi dang kin ka ayak kanga jangjaa sayur aser meraketdaksür. Tongtibang kaji kodang oshi ta südir, yangji sobaliba densema lir. Yamaji oshi aser sobaliba anaji adianu ama mesüra apu-ani ama lir aser oshiji kin ka tamendakdak aser temaitsüji lir.

Oshi ta kodang südir, oshiji asen taküm asoshi azüh ama, kechiba süra oshi ajanga nisung ka temulung nung tebilemba/taginüba, tashitemetet, tangatetba shisatsütem balala sadoka lemsatepa kati ka angatettepa yamaji nisung kaji tayimjem taküm ka kumteta inteter. Ano kati ka angatettepa tebilemba lemsatepa tongtepratepba dang masü, saka oshi ka ajanga kija aser lokti tsüngda tesendaktep tajung yanglur, nisung ka pa koba lokti, linük mesüra tesem nungiar meteta akümer. Oshi ajanga par sobaliba yimya balalatem shisangdakja par ayak jangjatsür.

Nisung ka taküm rangben temulung shisatsü, libaliru, sempet, sobaliba wainshin item tangazükba nguteta renloktdaksübaji pei oshi angateta jangjaa metetba ajanga lir. Pei oshi mangazük/mangatetbaji sobaliba sendokba ta ashitsü akok. Sobaliba aser oshi-obenji metaloktepa lir. Sobaliba sendokra nisung taküm kaji ayak khonang makai jaya-jako aser kibalenburen mashiteti, sobusolem mebendangtet pei kolen nungi aru mejangjai akümer. Tanü temetetba putu nung lanurtem aika tazüng tashi temetetba jenti lir saka temeimtsüka pei oshi mangazük aser mejembitetba ajanga sobaliba sendokba den saku-ku küma odagi.

Asenoki England nungerr-ji kodang repringdangdir par oshi English jembir aser par yimya libaliru ajak benshia England nungerrji England nungerr ama alir. Asenoki ano kodang India lima nung repringdangdir Bengali nungerria par oshi dang jembir aser Bengali nungerr ama alir. Assam nungerria Assemesese oshi jembia Assam nungerr ama alir. Asen Nagaland telung nunga Angami, Sumi aser tanga kin-tem aikati pei oshi jembia pei sobaliba nung tera yanga pei liso nüburtem den saku litepba asenoki jangjaa ngudaki.

Saka kodang asen Ao kin repringdangdir asen Aorbo talisa tanü lanurtem aikati asen Ao oshi memetet aser sapua mejembir ibayongji sobaliba mejangja, Aor senso tajung ka ama meliteti tanü Aor lanur jenti küma odagi. Pei oshi mashiba ajanga taküm jenjang "Aor" ta asüba samadoktsü tetenzükur akümer, kechiaser oshiji ajanga dang sobaliba, temeimtep, akhümstübutep, tesendaktep takang yangluteter aser idangji dang pa/la Aor/Aotsür ka ta jangja jangja meraketa kumdaksür.

Tanü lanurtemi tangar oshi Nagamese aser bendanger oshitem dang kanga sapua jembiteper, Hau! pi bendanger oshijia ashitsüla aser yangjia tangar dang nungi tajungba asütsübajia kanga dang tongtibang lir. Tensa mapang aser tesem balala dak apet oshi balala amshitsübaji kanga dang tim saka asen Aor kati Ao oshi meshira aji kanga dang maksü tulu lir aser Aor/Aotsür ka ta ajatsü mabensai kumdaksür. Saka tanü lanuri asen Ao oshi jembibajibo mashimalu, yimdaklir ka ama dang nemja bilemba tanü asen Aor lanur aika kumoggo, iba jakla ajanga asen Ao oshi renloktsü mesüa kumdaksür aser merenloker. Anungji item maashi tangatetba ajanga tanü lanuri asen oshi memeimer, mejembiner aser mashir. Aser iba ajanga tarutsü asen kin tesama tia kati anir arutsür asütsü, kechiaser tanü lanuri asen oshi meshira aser mejembira tarutsü putu nung par chirnurtem dang asen oshi mesayutsü.

Saka Nagamese, English aser tangar oshi parnoki tanü kechi angazüka meteta lir aser benshia amshia odaki aji dang tarutsü lanurtem dang sayutsü aser benshia aotsü. Idangji Ao oshi samaba den Ao kin tesama tia tensa ka ajurutsü südi ta tsübuseta/tsüremseta temulung shiranga bilemer.

Saka kodang asen Ao oshi merenlokba kulitem aser tia ajakji repringdanga shisadanga odir, Hau! lanurtem shilemjia lir saka ajak dak alia tai tulutibaji tanü tsüraburtem lir ta angateter. Kechiaser pei oshi ka yabo tongtibangsa kidang tetsü kati mesüra tsürabur anati mezüng kilung nungi jembia sayua tenzükur aser iba yimya nung tanurji inteter. Aser yamaji chirnurtemia kanga junga angazüka pei oshiji kanga sapua, meima par taküm piyong benshia aor aser pa/la taküm nung akhüm meraket aser pei kin temaitsü ayakji kanga jangjaa ngudaksür.

*(Maneni asüng adok nung...)*

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



# Saddleback Arogo nung tang mezüng tetsür asem 'ordain' süogo



May 06, 2021 aonung California nung aliba Saddleback Arogo nung tang mezüng tetsür pastor asem- Liz Puffer, Cynthia Petty aser Katie Edwards nunger ordain asüba mapang tangokba noksa nung angur.

**May 10, 2021:** California nung aliba Saddleback Arogoi tang mezüng tetsür pastor asem ordain süogo; iba Arogo ya Southern Baptist Convention (SBC) nung affiliate süa liaka parnoki tetsür pastor tem ordain asür.

Pastor Rick Warren-i aniba Saddleback Arogoi parnok indang Facebook page ajanga, Brihostibar aonung (May 6, 2021) Saddleback Arogoi putiotsü tasen ka yanglua tetsür pastor asem tang mezüng ordain süogo, ta metetdaksü.

Arogoi facebook post ajanga, "Onoki tang mezüng tetsür pastor asem- Liz Puffer, Cynthia Petty aser Katie Edwards nunger ordain süogo. Onokisa tain asem- Anthony Miller, Jeremiah Goley aser Jason Williams nunger commission süogo! Aser onoki

Celebrate Recovery nung lenir asütsü atema Pastor Johnny Baker shimogo," ta metetdaksü.

Honibar nikonngang (May 8) tashi nung Facebook post ji nisung aikati 'like' asü saka karibo tetsür ordian asübaji ashishia liasü.

Saddleback Arogoi maneni Southern Baptist Convention nung adentsü asü madentsüar tang tashi nungbo mejangja.

Arogo nung tetsür pastor tem ordain asübaji ashishia Grace Bible Theological Seminary nung theology professor, Owen Strachan-i, iba ya Laishiba nung shia aliba anema inyakba lir, ta ashi.

Owen-i facebook post ka ajanga, "Iba Arogo atema tanga lenmang ka bushitsü mapang tongogo. Memonotsüla. Ni iba ya züluba nung ya tetoktepba kecha mali,

ajisüaka Saddleback Arogoi inyakba mapaji ajanga ni mepelar, aser iba Arogo nungji züngsemtema aika mepelai alitsü akok," ta metetdaksü.

Owen Strachan-i 1 Timoti 2:9-15 nung ajemdaker Paul-i jembiba o lephsia, "tebur madak tashi amshitsü aser tetsürtemi sayutsü atema ni memelar; la ola madoki alitsüla," ta ashi.

Southern Baptist Convention (SBC)-i tetsür pastor tem ordain asüba magizüker, ibaji ajanga Arogo karibo iba denomination toktsüogo.

2020 küm coronavirus wara prok metenzükdang SBC nung pastor kari Chula Vista, California nung aliba Eastlake Arogo nung teaching pastor, Hosanna Wong SBC Pastors' Conference nung mejaoktsüla, ta takhangba agüja liasü.

Charlisha Standley-i ashi. Pastor kibong yaritsü atema senotsü lenmang bushirtemi ashiba agi, "Asüpila sentong agiba, mi agi ki rongdokba yanglushitsü aser tanga nungdak balala nung amshitsü atema onoki sarutetba sen ajakji Melinda aser lar kibong nem agütsütsü."

Tayimtsü tsükokba tatalokbaji National Transportation Safety Board-i bushisingdangdar.

Tayimtsü nung mena alir asemprong asü aser asürtemji arrshi küm 67 pilot, Louis Provenza, arrshi küm 23, Anna Calhoun aser arrshi küm 2, Harper Provenza nunger liasü, ta Forrest County Coroner, Butch Benedict-i metetdaksü.

University of Southern Mississippi-i ashiba agi, tayimtsü nung nisung asemji graduation sentong nung adentsü atema Hattiesburg-i aoba mapang iba lendong atalok.

# Mississippi nung tayimtsü tsükokba lendong nung pastor ka asü

**May 10, 2021:** Mongolbar aonung Mississippi nung tayimtsü tilaka nung Texas nung alir asem university graduation sentong ka nung adentsü aoba mapang tayimtsüji pastor ka kidang tsükok, aser iba lendong nungji arrshi küm 55 pastor Gerry Standley asü.

Mitsubishi M-2B-60 tayimtsüji pastor, Gerry'er kidang tsükokba mapang nung kidangji pastor densema nisung pezü liasü; pastor Gerry ya Wayside Holy Temple Arogo nung Assistant pastor teinyakdak liasü.

Hattiesburg nung alirtemi pastor Gerry'er kibong yaritsü atema Amongnü (May 9) tashi nung US sen 11,000 jungnüa sarutetogo. Pastor nem akhüm agüja Honibar aonung Arogopurtemi candlelight service ka agia liasü.

Taoba ita nung ang Gerry Standley aser pa kinüngtsü, Melinda nati tena kibong kümer küm 22 ajungba benjung monga

liasü.

Pastor kinüngtsü, Melinda ya Police department 911 center nung Division Manager inyaker. La den lar jala, Arrianna aser semchir Eli nungerbo kidang liaka iba lendong nungjagi jenbu.

Osangbener den jembidang Standley teno, Cobrin Varnado-i, "Onoki pa melentsü makok. Pai inyakba ama onokibo meinyaktettsü saka par adianutem, par jabasotem aser kinüngertemi longjemmer pai inyakba ama Arogo nungittsü," ta metetdaksü.

Varnado-isa, tedii Tsüngrem den tesendaktep tajung ayuba dang masü pa kinüngtsü aser kibong den tesendaktep tajung ayubaji pai teti nukshia liasü, ta metetdaksü.

"Pai ajak den tesendaktep ayu. Ajaki pa meim aser paia ajak meim," ta paisa ashi.

"Tang mapang nung ozü kibongi teyari kanga nungdaker," ta pastor kinünger,

# ANOGO ABEN TSÜNGREM DEN

## Sarasademi Tsüngrem tebilemba meteter

Aser anepdang, sangwatsü mapang talangka lia, Pa shishir, azüngmeyakdaki kati ainshia ao aser yangji sarasadem. Mark 1:35.

Yisu anepongi sarasademi aoba nütsüngtemi meteta liasü. Kodang parnoki Pa nungdakdir Pa sarasademdaki aotsü parnoki metetta liasü. Kodang Yihudai Yisu ashioktsü, pai tsükchirtem Yisu sarasademdagi anir ao.

Mapang shia Yisu Khristai tongtipang telemtetba agidang Pai sarasadem. Kodang Pa dang Tebu inyakyim nung masü, alima inyakyim mapa inyaksü atidang, Pai sarasadem (Matt. 4). Kodang nütsüngtem shimtsü mapang aru, Pai aonung tepiyong sarasadem (Lk. 6:12). Tsüngrem chiri Tebui mulungba metettsü asoshi aonung sarasadem süra, Tebui mulungba tejanga metettsü asoshi asenoki mapang kopika agitsüla?

Aiben Yisu telok tului nungpanga liasü, Tebu ola angashitsü asoshi Pai sarasademdak ka nungdak ta Pai metetta liasü. Yisui lemanng melenshitsütsü meranger nisung aika liasü. Pa nütsüngtem Pa telok alidaki odaktsünü (Mark 1:37). Teloki Pa chuba kümdaktsünü (Yohan 6:15).

Satani pa nükjidong melenshitsü atidang (Matt. 4:3,6,9). Yisui Pa missionji telok tulu anidentsüba masü, saka Tebu dang tashi angaa alitsüba ta angatetta liasü. Sarasadem agi Yisu tenzükba mapa asoshi renemtsü (Lk. 6:12). Sayatenya dang tama sarasadem liasü (Yn. 11:42-43); Lendong mapang nung sarasademi pa tasü itdaktsü (Lk. 9:28-31). Sarasademi Pa kangki-i atutsü tashi tasü itta kümdaktsü (Lk. 22:41-42); aser sarasademi timtem arema kangki Pa tanela odaktsü (Lk. 23:46). Kümtetdakba tatishitsü anidakang aser ne kija sarasadem nung Kibuba den mapang agiang aser ne taküm asoshi mapa renemang.

# Tenla ki asüba nokdangtsü atema Pastor ka nem miim chisema südaktsü

**Nairobi (Kenya), May 10 (Agencies):**

Uganda linük nung pastor kati Tenla ki asütsü aliba nokdangtsü atema Muslim nungertemi Pastor nem miim chidakja südaktsü, ta osang ka ajanga metetdaksü.

Muslim nungertemi alizüksü bilema aliba li nungji Tenla ki asüba nokdangtsü atema parnoki pastor nem miim chisema südaktsü, ta mezüngyongi melung melemi bilem.

Pallisa District kübok Raraka yimdak Raraka Trading center nung ali acre pongu nungji Muslim nungeri school ka aser mosque ka yanglutsü tebilemba liasü saka Pastor, Yolonim Oduchu-i parnok dang aliji ayoktsü memelung, aser April 5 nü pa miim chisema südaktsü, ta pastor adianu, Francis Okirya-i metetdaksü.

Okirya-i, "Alia Opeduru den Muslim nugneri aika arua küdi dang iba liji ayoktsü aiben asüngdanga liasü, saka parnoki sen kanga ajema agütsüba agi küdi aliji ayoktsü memelung. Tesülen Opeduru-i küdi amokmerena liasü," ta metetdaksü.

Iba li nungji mosque ka yanglutsü atema Muslim

nungertemi Turkey nung sponsor ka ngur liasü.

Raraka nunger kati ashiba agi, Pastor Oduchu-i mapang shia Raraka trading center nung aliba Muslim nunger hotel ka nung chiyunga liasü, aser April 5 nüa pa kasa hotel nungji chiyunga sülen temang mejungi aküm.

Osangbener den jembidang pa kinüngtsü Mary-i, "Kü kinüngbo motorcycle ka nung kidangi meyipa aru. Pa tebok ashiba den külemi tebok ao aser saaktsü tenzuka liasü. Onoki pa anasa aliba clinic kati anir ao, saka mekümzükteti asü," ta metetdaksü.

Pastor Oduchu tasü mang April 10 nü remogo.

Yimdaklirtemi tejashi nung hotel kibur dang asüngdangyaba mapang nung hotel kiburi, nisung kar tetuyuba nung pai chiyungtsü nung miim inoktsü, ta nangzük. Iba sülen Police-i Opeduru apu aser yimdaklirtemi tejashi nung Opeduru'er ki rongdoktsü.

Uganda linük temzüng nung tamangba yimsü ajak sadoka amangtsü aser benshitsü temeden agüja lir, ajisüaka mapang shia Khristantem anema inyaker.



**OLONG PAITEP # 5808**

1		2		3		4				5
6								7		
						8		9		
										10
	11					12				
13										
14				15						
16										

- |                          |       |                         |       |
|--------------------------|-------|-------------------------|-------|
| <b>TIPIEN</b>            |       | <b>LANGTSÜNGLEN</b>     |       |
| 3. Sowar                 | - (7) | 1. Ak mesükba shiruru   | - (6) |
| 6. Nüngo                 | - (7) | 2. Tagitsü              | - (7) |
| 7. ___ nung lir          | - (3) | 3. ___ ___ lai          | - (5) |
| 8. Mangmang              | - (4) | 4. Tzünglu aruba mapang | - (3) |
| 11. ___ ___ lang atur    | - (4) | 5. Ya                   | - (4) |
| 14. Ayong temdangba      | - (3) | 9. Mapa tamajung        | - (7) |
| 15. Ajak rajema lir      | - (7) | 10. Tali/alia           | - (6) |
| 16. Mimong temalen satem | - (7) | 12. Ken dang masü       | - (5) |
|                          |       | 13. Tazüng              | - (4) |
|                          |       | 15. ___ ___ idang       | - (3) |

**OLONG PAITEP # 5807 TELANGZÜBA**

- |                                   |  |
|-----------------------------------|--|
| <b>TIPIEN :</b>                   | <b>LANGTSÜNGLEN :</b>                  |
| 1. Labi, 2. Telung, 5. Jangzü,    | 1. Lemjem, 2. Tanü, 3. Langzü, 4. Ani, |
| 6. Gado, 7. Aginü, 10. Tali,      | 7. Adianu, 8. Amokmeren, 9. Agi,       |
| 11. Lungko, 12. Tebung, 13. Nile. | 11. Lung.                              |



**Künü Alokbai par Arogo Pastor-ba ajurua jembishinür**

**Alokba :** Hey pastor, good morning, tanep yabo koloni aoerba yamai ilongseta jajar aka? Mesüra shiranger kibong kar dangi aoerba?

**Pastor :** Nungni tukurama, ni ya hopta asemubaba asen arogo nung kiboksem nung kanga dang mazüngi senzürba ser nung ano shiranger ka kanga mejungi lir ta angashia par ki bushiyonga odangerba ati. Süra tanübo kü den nüngdak kar jeminüa ni atar asü koda?

**Alokba :** Auh ni tanübo nü den nüngdak kar jeminüa aliba mapang shidak nung na ajurur ati. Oda nenok pastor-tem ya nübur asoshi mapang ajak nung mazüngi dang aliba ya angudang onoka kanga dang pelar ako, talisa asen Arogo züngsem aika tamanger kibong ser nung pei kibong nung pei chirnur den külemi mener kibok tekülem magitetba tsürapura aika dang aliba mapang ano oba wara tesashi agi tamangertem sentep magitettsüsa aru nung, oda taoba küm nenok pastor temi pei arogo dangi phone ajanga laishiba aser ken atentsü yokba amala maparen tajung tu ano sentep ki lapoka mekülem tashi mapang ajak nung inyak nungbo oda asen tamangertem tali temoatsü angutsü. Ano taküm küma kechi koma tiya ka ajurutsüra asenoki kecha meteta mali nung, oda nenok anibelem jenti liaka asen amangbapur asoshi tajungtiba ka inyaktepdaktsüner ako.

*Lilir: Mr. S, Repa Pongen, Mon Bosti.*

**TANÜBO NAI LANGZÜANG**

Q. Railway nung \_\_\_ küm steam locomotives tenzüksü.  
 A. 1853      B. 1852      C. 1836      D. 1823


\_\_\_\_\_ (Taruba adok nung onoki langzütsü)

**YASHI ADOK TELANGZÜBA :** Endangered

**AO OSHI ANGAZÜKDAK**  
**TANÜ ANGAZÜKTSÜBA OJANG**

**Iba / ibai**  
 (Pronoun)      ya ta teyuba (this)  
 \*      Iba ya par nashi lir.

**Idaki**  
 (adverb)      yangi (here)  
 \*      Idaki kü medemertem alir.



**NAI-A YA METETTER MA?**



Marine Iguana ya metong nung süklep 4 nungi 5 talang aser touzük seret pungo dak tema alir. Tzürang mesüra sangken mesük shiruru ya tekong aser tzü nung alir. Tzüyim telung nung tsükchir talisa Shark amala nungi jenbotsü/kümzüksü mechi, Marine Iguana yagi mapang talangka tango sota ayuba den minute 45 tashi temulung arakzüka anendaktsüteter.

**SUDOKU # 5852      TELANGZÜBA # 5851**

7					4	3	2	8	4	7	1	3	9	5	6		
6		4		8		5	2	7	9	3	5	6	2	1	4	8	
3	5			2	9			6	1	5	9	4	8	2	3	7	
4		5				2	9	5	2	9	3	7	6	8	1	4	
1		3						8	4	6	1	2	5	3	7	9	
					9		3	3	7	1	4	8	9	6	2	5	
	8					9		1	6	7	2	9	4	5	8	3	
	3					7			4	3	8	6	5	1	7	9	2
			3		1				9	5	2	8	3	7	4	6	1

**OJANG LUTEP # 5394**

LOEKT	:	<input type="checkbox"/>
UNNG	:	<input type="checkbox"/>
HSSAI	:	<input type="checkbox"/>
TNGAJU	:	<input type="checkbox"/>
TAAGÜÜBS	:	<input type="checkbox"/>
NAAAJG	:	<input type="checkbox"/>
UONNNGGR	:	<input type="checkbox"/>
AAMKI	:	<input type="checkbox"/>
NESPÜA	:	<input type="checkbox"/>
IKENARY	:	<input type="checkbox"/>

**OJANG LUTEP TELANGZÜBA # 5393**

**TANGAR TASHIMAIT TETSHIA ASENI INYAKBA DEN MEDEMA JEMBITSÜ NÜNGDAK MADOKER**

**TAN HOPTA ATEMA - KOMA SÜLA ?**

Q. Asen lima nung Covid-19 agi shirangertem anepalutsü pur doctor aser nurse-tem agi meperi aküm nunga koma süla ?





May 10, 2021 nü Raj Bhavan Kolkata nung West Bengal Angh, Jagdeep Dhankar-i ketdangsa Minister tem tenangzükba agidaktsüba sülen tangokba noksa nung angur. Kasa noksa nung West Bengal Chief Minister, Mamata Banerjee-a angur.

## Party-i tamakok anguba junga asadangtsü nüngdak: Sonia

**New Delhi, Monupii/May 10 (Agencies):** Tawa state pezü aser UT ka nung agiba assembly elections nung party-i tamakok angubaji lenla ajak nungi junga asadangtsü nüngdak, ta Hombarnü Congress Party Tir, Sonia Gandhi-i ashi.

Party-i tangazükbatem angutsü atema atangji agizüktsüla, ta lai ashi.

Congress Working Committee (CWC) senden nung jembidang Sonia Gandhi-i, tawa assembly elections nung party-i tamakok anguba lenla ajak nungi junga asadangtsü atema telok tilaka tentetsü, ta metetdaksü.

"Asenoki tamakok angubaji süoki ia agitsüla. Tang tamakok anguba ya lenla ajak nungi asadangtsü aser osang metetdaksütsü atema ni telok tilaka tentetsü tebilemba lir," ta lai ashi.

Tawa elections nung tamakok anguba meyipa repringshitsü aser o lemteptsü atema Congress nung temaba telok CWC senden ya ayongzükba amen.

Congress-i West Bengal nung menden ka nunga takok mangu, Kerala aser Assam na nunga takok mangu aser ita ishika tejaklen Congress sorkar aliba Puducherry nunga takok mangu. Ajisiüka Tamil Nadu nungbo Congress-DMK teloktepi takok nguteta liasü.

Sonia Gandhi-i, "Kechiba asenoki Kerala aser Assam na nung tang aliba sorkar matsüngdokter asenoki junga angatetsü nüngdak; kechiba West Bengal nungbo asenoki menden ka nunga takok mangu angatetsü nüngdak," ta ashi.

Laisa, Congress Tir tasen shimtsü atema kasa senden nung jembitsü ta metetdaksü,

ajisiüka tang wara aliba agi Congress Tir tasenba shimtsü atema mapang atsülanger.

CWC senden nung Rajasthan chief minister, Ashok Gehlot-i, tang linük nung Covid tensa aliba nung ajemdaker Congress Tir election atsülangtsüla, ta benokba sülen party lenir, Ghulam Nabi Azad-ia kasa tebilemba lemsatop.

Tang linük nung Modi-i aniba sorkari coronavirus wara junga mazüoktetba aija SoniaGandhi-i, "Iba tensa ya kanga mejungi kümogo. Sorkar yimsüsübaren tamajungba akümer. Scientific tsütsü nungi shisa lemsatopba sendoker aser Modi sorkari iba wara sendokba ajanga linük kanga akoksadar; atangji tajangzük angutsü atema sorkari lokti sentong tulu agitsü melaba ajanga iba tensa tamajungba aküm," ta ashi.

## Covid tensa atema temeja senden ka ayongzüktsüla: Adhir

**New Delhi, May 10 (Agencies):** Hombarnü Congress MP, Adhir Ranjan Chowdhury-i linük Tir, Ram Nath Kovind dang, tang linük nung coronavirus tensa atema Parliament nung senden temeja ka ayongzüktsüla, ta mepishia metetdaksü.

Shidi ka ajanga Chowdhury-i Tir dang, constituency balala nung MP temi pei nüburtemi ajangshiba tebilemtsü lemsateptsü atema "covid crisis" senden ka ayongzüktsüla, ta ashi.

"Linük nung Corona wara tensa ya kanga majung, aser nai-a ibaji junga meteta alitsü südi. Tang ama tongtibang tensa ka nung ni nü dang Parliament nung senden temeja ka ayongzüktsü mepishir," ta Chowdhury-i Tir dang mepishi.

"India nung constituency aika lir, aser state balala kübok item constituency nung Member of Parliament temi peipei tesem nung nüburtem tia lemsatepnüa alitsü. Nüburtem khuret pungbatsü atema

lenmang bushitsü asoshi senden ka ayongzüktsüla," ta pai shidi nung shia lir.

Amongnü Rajya Sabha nung opposition lenir, Mallikarjun Kharge-ia shidi ka ajanga Ato kilonser, Narendra Modi aser Rajya Sabha Chairman, M Venkaiah Naidu na dang, linük nung coronavirus tensa atema o lemteptsü asoshi party ajak senden ka ayongzüktsüla, aser Parliament Standing Committees senden-a ayongzüktsüla, ta mepishia liasü.

## India nung ano nisung lakh 3.66 dak Covid putet aser 3,754 asü

**New Delhi, May 10 (Agencies):** India linük nung ano nisung lakh 3.66 dak coronavirus putetba sülen linük nung iba tashidak agi teshirangdakpur lakh 37 jungogo. Tesüiba ghonda 24 tsüngda linük nung nisung 366,161 dak coronavirus putet aser iba tashidak agi nisung 3,754 asü; tang tashi nung linük nung nisung million 22.66 dak iba tashidak putetogo aser nisung ajak agi 246,116 süogo, ta Hombarnü Union Health Ministry-i metetdaksü.

Tang linük nung iba tashidak agi teshirangdakpur 37,45,237 jungogo aser ibaji coronavirus caseload nungi shilem 16.53 lir.

Iba tashidak agi shiranger ajak agi 1,86,71,222 anepogo aser iba tashidak agi shiranger asübabo

shilem 1.09 dang lir, ta Health Ministry-isa metetdaksü.

Tesüiba hopta ka tsüngda (May 3 nungi May 9 tashi) India nung iba tashidak agi shiranger 27,000 dak tema süogo aser nisung lakh 27.4 dak iba tashidak putet, aser ibaji tanü tashi nungbo hopta ka tsüngda nisung timtiba dak putetba lir. Iba dak alia iba tashidak agi anogo shia nisung asüba shilem 15 agi timba kümogo.

Hombarnü Indian Council of Medical Research (ICMR)-i, tang tashi nung linük nung samples 30,37,50,077 tendangogo aser iba nungji Amongnü (May 9) samples 14,74,606 tendangba densema lir, ta metetdaksü.



Visakhapatnam, May 10, 2021: Hombarnü INS Airawat rong nung Cryogenic Oxygen tank 8 den Oxygen Cylinders 3,898 Visakhapatnam tonga bener arua aliba noksa nung angur. Oxygen tanks aser Cylinders ya Singapore nungi bener aruba lliir.

## WB nung Suwendu opposition lenir shim

**Kolkata, May 10 (Agencies):** Hombarnü BJP-i West Bengal assembly nung opposition lenir asütsü atema Suwendu Adhikari shimogo.

Hombarnü BJP pur Hastings office nung tang shimba MLA tasenpurtem senden ka ayongzükba amenba sülen Union Minister, Ravi Shankar Prasad-i, BJP legislature party nung lenirji Suwendu asütsü, ta metetdaksü.

Tawa TMC toktsür BJP nung adensang, Suwendu-i

Nandigram assembly menden nung TMC tongti aser Chief Minister, Mamata Banerjee madak takok ngua liasü.

Taoba mapang state minister, Suwendu-i election matongdang TMC party toktsür BJP nung aden.

Tawa state assembly election nung TMC-i menden 213 nung takok angu aser tongti opposition BJP-i menden 77 nung dang takok angua liasü. West Bengal nung assembly menden 294 lir.

## Joko Kerala-i tanga states nem oxygen magütsütsü: Pinarayi Vijayan

**Thiruvananthapuram (Kerala), May 10 (Agencies):** Hombarnü Kerala Chief Minister, Pinarayi Vijayan-i Ato kilonser, Narendra Modi dang, Kerala nung coronavirus tashidak timba-timba putetdar, anungji tang nungibo state-i Tamil Nadu aser Karnataka na nem oxygen supply magütsütetsü, ta metetdaksü.

Kerala nung oxygen peria aliba agi parnoki state ana yaria aruogo.

Shidi ka ajanga Vijayan-i, state nung oxygen 219 metric tonnes adokdaksür, saka

anogo shia oxygen timba-timba nüngdakba nung ajemdaker joko onoki tanga state tem nem oxygen magütsütetsü, anungji ozü dang, Kerala nung coronavirus tashidak timba-timba putetdar, melatsüla, ta metetdaksü.

Oxygen 450 tonnes rizünga liasü saka tangbo 86 tonnes dang anüngogo aser state nung iba tashidak kanga putetdar, anungji joko onoki tanga state nem oxygen magütsütetsü, ta Kerala Chief Minister-isa metetdaksü.

Tang Kerala nung coronavirus agi teshirangdakpur lakh 4.23 lir.



May 10, 2021 nü New Delhi nung aliba BLK-Max Hospital nung arrshi küm 18 ser temapurtem coronavirus vaccine agitsü atema ataba noksa nung angur.



## Taliban-i Eid tenüng nung asemnü ceasefire sangdong

**Kabul, Monupii/May 10 (Agencies):** Afghan yimtiba, Kabul nung school ka tezülen bomb agi tetsür chanu timba sür nisung 50 dak tema tepseter anogo ana lir Taliban-i linük tesem ajunga nung Eid al-Fitr benjong amungtsü mechi asemnü ceasefire sangdonga liasü.

"Eid mezüng anogo nungi tasemnü tashi linük tesem ajunaglen Islamic Emirate indang Mujahideen dang tsükchir anema operation agiba ajunga anentsü totuyuba agütsür," ta Taliban-i Hombarnü sangdong ka nung ashi.

"Saka anogo asem mapang tsükchirtemi nenok dak makra, na aser na aliba tesem kumzuka nokdaksü renema liang," ta ashi.

United States-i iba linük nung arua Taliban-i yimsü süa aliba atsüngdoka küm 20 raraba sülen par sepai anünga aliba 2,50 maneni anizüker aoba mapang ka nung iba osang ya sangdonger. US-i anir iba linük nung yimjung bener arutsüsü merangba maparen nung tetsükdaksü ajurur, kechiaser Taliban aser Afghan sorkar tsüngta jembishinü

nung terenlok kangabo mali. Muslim nunger lumiba ita, Ramadan tembanga Eid al-Fitr ya amunger. Taoba küma iba benjongmung nüngtem nung Taliban-i ceasefire sangdonga liasü.

Yimya agi sorkaria telangzüba agüja khen atema rara anena atar, aser chief negotiator Abdullah Abdullah indang odongtar Fraidon Khawzon-i, "Onoki iba sangdong ya pelashishia agizüker... Islamic republic-a renema lir aser yakta sangdongtsü," ta Hombarnü ashi.

Saka Taliban ajanga ceasefire sangdongtsü ghonda ishika lia Zabul province nung bus ka poksaa nisung tajemba agi 11 asü, ta interior ministry-i Hombarnü ashi.

Hombarnü Zabul nung bus apokdak nisung 28 yiru, ta interior ministry indang odongtar Tariq Arian-i osangbener dang ashi.

Linük yimtiba tezülen Hazara kin timba aliba Dasht-e-Barchi nung tetsür azüngba school ka kima Honibarnü lendong atalokba atema sorkari Taliban tenüng sena aliba mapang anogo asem yimjung

alitsü ya sangdong. Nüburtem benjong atema shishilempaba mapang school kima bomb ishika apokba lendong nung nisung 68 asü aser 165 yirua liasü.

Afghan Tir Ashraf Ghani-i Mongulbarnü linük ajunga nung mangyimsü sangdongogo.

"Item mapa tamajung inyakba telok yagi tongpang nung sepaitem den raratsü tashi mali aser nüburtem aliba aser tetsür azüngba school nung tenük yoker amaker," ta pai sangdong ka nung ashi.

Taliban-i iba azüdokshinung shilem mali, ta shiogo aser sangdong ka nung, linüki shisaliok angazükba reju aser centre tem kumzuka ayutsü nüngdak, ta ashi.

Deobarnü kinungertemi iba lendong nung asürtem tasümgang ya "Martyrs Cemetery" ta nüngja agüja alidak tenemkolak nung remogo, kong Hazara kin dak amakba mapang asürtem aremer.

Nütsümgang yongsük million 38 aliba linük nungya akhi mapang nungi Hazaras tem reshikangshi timtem balala ajurua arur. Hazaras ya Shia Muslim nungertem lir.

## Suu Kyi May 24 nü okadak nokdaksü

**Yangon, Monupii/May 10 (Agencies):** Obendanger kati Hombarnü Myanmar nung atsüngtoker aliba lenir Aung San Suu Kyi dang May 24 nü tsüngtong arua okadak nokdaksü atema tetuyuba agütsüogo, ta la okatsüri ashi. Hopta aika ken o angadangtsü asoshi anogo thinena aruba sülen tang iba tetuyuba agütsüogo.

February 1 nü military-i sorkar atsüngtokba sülen la yimjak nung khen danga mongui arudar.

Iba sülen la ken o aika nung aitsü aser la indang legal team la den ajuruteptsü atema kanga timtemtepa arudar.

Linük yimtiba Naypyidaw nung Suu Kyi, video conferencing ajanga ken o balala bendangba nung shilem agiogo, saka inyakyim dak temulung kanga masüba lemsatepogo.

Hombarnü tatemsa ken o angadanga mapang obendanger kati, la dena lia lar ki anasa special courtroom ka nung o bendangtsü tetuyuba agütsüogo.

"La okadak May 24 nü nokdaksü," ta obendanger Khin Maung Zaw-i AFP dang ashi.

Ajisüaka pai, la den majurutepteti aliba ya ano tang tashi mebenteti lir, ta ashi.

"Tebilemtsü ano mebenteti liasü, kechiyong la den ajuruteptetsü majuruteptetsü ta asüngdanga police temi tang tashi telangzüba magütsüi

lir," ta pai ashiba den private counsel ya defendant temeden lir ta ashi.

Arishi küm 75 tain taoba lenir ya apuba sülen ken o trok tashi nung aitsüogo.

Ken o tem rongnung, taoba küm election atema nüboyimba mapang coronavirus dak sendakba nung tenokdanga agütsür aliba nung aibelenba aser license maliba walkie-talkies yua aliba densema lir.

Taitsüba rongnung tongtibangtibaji lai linük indang colonial-era Official Secrets Act dak sendakba nung aibelenba asütsü aser iba ken o ya Yangon nung okadak ka nung bangdaka lir.

Junta-isa, la ochi mashi ken o nung densema lir ta shiogo, ajisüaka iba dak sendakba nung ken o kecha benoka mali. Lai sübokrem ama sen aser hon telong agizüka agi, ta shia parnoki la aitsü.

Junta-i la apuba rasaa ashitsü meranga arudar aser sorkar atsüngtokba ya democracy kümzuka ayutsü atema ta ashir. Junta-isa taoba küm November ita election ya ochi mashi inyakyim ajanga National League for Democracy Party-i akok ta shiogo.

Coupmaker Min Aung Hlaing-i Myanmar nung legislative, executive aser judicial tashi ajak bena lir.

Sorkar atsüngtokba sülen Myanmar nung tang tashi nüburtemi longkak aita arudar aser nisunga aika tepsetogo.

## Israel sepaitemi Al-Aqsa kima Palestine nunger aika yirutsü



**Jerusalem, Monupii/May 10 (Agencies):** Israel sepaitemi Hombarnep Al-Aqsa Mosque compound telungi aita Palestine nunger tekülemer dak ngisa agi meyipanga aliba injang, tear gas aser sound bomb khalokja nisung noklang aika yirutsü.

Hombarnü menur Jewish nationalist tem yimti ajanga jajatsü sentong lia occupied East Jerusalem nung iba azüdokshi ya ataloker. 1967 küm East Jerusalem amokbanga mapang tatsüka lir Israel-i agiba anogo bilemteta küm shia Jerusalem Day Flag March ya alir.

Iba mapang Old City aser East Jerusalem nung Palestine nunger alidak rara mesüa Zionist activist lanurtemi jajar.

Israel nungeri Al-Aqsa Mosque kima mita aoba ya

mapa tamajung ka lir, ta Palestinian National Initiative party lenir Mustafa Barghouti-i ashi.

Israel nungeri amakba mapang Barghouti ya compound telung nung liasü aser Israel nungeri meimchir temeden ajunga nung aibelenba mosque telung nung alir dak amak, ta ashi.

Parnoki yirur alirtem anepalutsü arurtem daka kuli kecha mali züka merenshi, ta pai ashi.

Al-Aqsa Mosque nung lenir aser sayutsüngir Sheikh Ikrima Sabri-i sangdong ka nung, "Israel Ato Kilonser Benjamin Netanyahu-i par nübur temolung südaktsütsü mechi Al-Aqsa compound amaktsü totuyuba agütsü, aji asüngnung ang pa ato kilonser menden nungi

malutsü," ta ashi.

"Netanyahu-i parnok nem sempet ka ama agütsünü. Al-Aqsa Mosque compound nung mapa tamajung inyaba ya senzuka yutsüla masü," ta Sabri-i ashi.

Iba lendong nung nisung 305 yiru, ta Palestinian Red Crescent ajanga ashi.

Nisung 228 shi occupied East Jerusalem nung aliba mozüki aseme bener ao, aser nisung tenet kangasa mejungi yirur lir.

Israel sepai 21 yiru, ta Israeli army radio ajanga ashi.

Mapang tatsüka lir Israel sepaitem iba tesem nungi ainshiba yong yangji aliba Palestine nungertem aotsü maongka angu, saka parnok kar nüngzuka iba tesem mürekmejua liasü.

## Philippines-i SC tzüym nung military base ka amenoktsü sentong yangludat

**Manila, Monupii/May 10 (Agencies):** Philippines-i, South China tzüym nung asetkong ka mitkar mongjen (military hub) kümdaktsütsü sentong yangludat. China den mangatettep adoker aliba mapa tang parnoki iba sentong benoktsü asameyangdar.

South China tzüym tali tekümdanga meita atatsü atema asameyangtepba mapang ka nung Philippine military-i tir Rodrigo Duterte dang Thitu asetkong nung logistics hub ka amenoktsü atema senotsü teyari agütsütsü asoshi asüngdangtsü, ta chief General Cirilito Sobejana-i ashi. Parnokisa asetkong temeket nung inyakyim tem asadangtsü atema high-resolution, night-capable camera tem amenoktsü sentong lir, ta pai ashi.

"Onok nükjidongji Chinese maritime militia aser tanga China nunger rongtem onok indang economic zone nungi mintoktsü asoshi lir," ta

Sobejana-i CNN Philippines dang Hombarnü ashi.

China-i Philippines den mangatettep adoker aliba sensaksem ajanga bentettetsü, ta Chinese Foreign Ministry otongdar Hua Chunying-i, Hombarnü Beijing nung osangbenertem den sensaksemba mapang ashi. Osangbenertemi Philippine military sentong indang asüngdanga mapang Chunying-i iba telangzüba agüja liasü. Ken o rasaa meshi lai, nisung kari ken o tali mora odaktsür, ta ashi.

Mangatettep adoker aliba tzüym nung Philippines aser China na tsüngda hopta ishika tensa mejungi lir. Manila-i China nunger rongtem dang iba tesem toktsür aotsü atema metetdaksüogo. Ajisüaka Duterte-i China den rara memenatsü asoshi kanga kümdanga inyaksangshidar, kechiyong Beijing nungi Philippines asoshi coronavirus vaccines tem bener arudar.



## Security Forces-i yimtsüng ana nung medical camp ayongzük

**Dimapur, Monupii/May 10, 2021 (TYO):** Deobarnü (09.05.2021) HQ IGAR (North) kübok Jalukie Battalion indang Assam Rifles-i Nzoa Village, Peren District nung angati medical checkup camp den repsema COVID-19 Awareness Drive sentong ayonga agiogo, ta sangdong ka ajanga metetdaksü.

Iba camp agiba mapang, medical team-i medical teyari, mozütem aser COVID-19 dak sendakba osettsüsettem lema agütsü. Nzoa yimtsüng nung tanur aser tain ajak sentepa nisung 57 tashi temang

reprangdakja yariogo.

Tang ama Covid-19 tensa tamajungdang, iba wara menatepba/prokba aziöktsü asoshi tali kümdangshia alitsü dak sendakba nung sentong ka medical camp den atongsema agiogo. Iba sentong nung teintet rogu, tetsür aser tanurtem denogo.

Maneni, kasa sangdong ajanga angazükba agi, OP Sadbhavana mapatong shilem ama Spear Corps kübok HQ IGAR (North) indang Kiphire Battalion - Assam Rifles-i Hombarnü Phokphur Village, Kiphire District nung angati medical checkup camp den

COVID-19 awareness drive sentong ayongzükba liasü.

Medical team-i yimertem nem medical teyari, mozütem aser COVID-19 dak sendakba osettsüsettem lema agütsü. Iba medical camp nung tain aser tanur ajak sentepa nisung 72 shi temang reprangdakja anepaluogo.

Iba camp den atongsema, Covid-19 dak sendakba nung tekümdangtsü sangoktsütsü atema team-i sentong ka agiogo. Iba awareness drive sentong nung teintet rogu, tetsür aser tanurtem denogo, ta kasa sangdong nung shia lir.

## 'Senior Year' nung Justin Hartley aniok

**New Delhi, Monupii/May 10, 2021 (Agencies):** Taruba film 'Senior Year' nung Justin Hartley denogo.

'This Is Us' nung shilem agir Justin, Angourie Rice, Sam Richardson, Zoë Chao, Mary Holland aser Chris Parnell nungeri iba high school comedy nung Rebel Wilson den külemi shilem agiba angutsü, ta Deadline sangdong ka ajanga metetdaksü.

Iba film ya cheerleader ka küm 20 coma' nung lir sülen high school-i aotsü tenzüka aser lai prom queen title angutsü merangba indang otsü ka alitsü.

Alex Hardcastle-i iba film direct asütsü. Andrew Knauer aser Arthur Pielli na den longjemer Brandon Scott Jones-i iba film atema script



zulutsütsü. Kasa mapang, Jeremy Stein aser Jake Wagner nati executive producer ama inyaksü aser Rebel-ia producer maparen achaayangtsü renema lir.

Tawa, Rebel-i 'Bridesmaids' nung Melissa

McCarthy indang shilem agütsü sentong liasü. 'Isn't It Romantic' star Rebel-i 2011 rom-com classic' nung Megan atema audition agütsü, saka film yanglurtemi iba character atema la meshim.

Ajisüaka, lai iba film yanglurtem mulung peladaksüba ajanga parnoki la nem Brynn' shilem lezmüksü, koba Matt Lucas indang character Gil'er roommate alitsü.

Rebel-i ashiba agi, "Iba movie nung kü character mamshitsü sentong liasü. Ni Melissa McCarthy indang character atema audition agütsü aser iba atema parnoki ni meshim. Parnoki kü audition sapuba ajanga iba film nung tanga character ka atema ni aniok.

## 65W Fast Charging aketba Oppo K9 5G saya

**New Delhi, Monupii/May 10, 2021 (Agencies):** Qualcomm Snapdragon 768G processor den triple rear camera aketba Oppo K9 5G China nung sayaogo. Iba smartphone ya taoba küm sayaba Oppo K7 5G den tatongtep alitsü.

Iba smartphone ya storage model ana (anaprongla nung 8GB RAM dena lir) aser sentsü tapu ana Black aser Gradient nung angutsü. Oppo K9 5G jelia mekaa ayutsü asoshi lapktsüogo aser tanga shishilembadak iba smartphone sayatsü asoshi company ajanga osang tejangja agüja mali. Flagship Android smartphone balala nung agüja aliba ama company-i iba smartphone nunga 65W fast charging inoksemtsüogo. Shishilembadak Oppo K9 5G yagi entry-mid-budget segment nung Xiaomi aser Realme den tokteptsü terenemba lir.

Specification tsütsü reprangdangra, Oppo K9 5G nung 6.43-inch Full-HD+ display den 90Hz refresh rate, 180Hz touch sampling rate aser 91.7 percent screen-to-body ratio angutsü. Phone tejaklen hole-punch cutout

nung selfie camera ka inokja lir. Octa-core Qualcomm Snapdragon 768G SoC den Adreno 620 GPU, 8GB RAM aser 256GB storage ajanga iba phone maparen achaayangtsür. Iba phone yagi USB OTG support asür, koba ajanga user temi iba phone nungi indang indanga external driver temi file tem transfer süteter.

Oppo K9 5G tesülen triple camera ya rectangular module ka nung inokja lir, koba black colour finish nung angutsü. Tesülen camera system nung 64-megapixel primary camera den f/1.7 aperture, 8-megapixel ultra-wide-angle camera den f/2.2 aperture, 2-megapixel macro shooter den f/2.4 lens meyoktepa inoktsüogo. Selfies aser video calling janngar atema, Oppo K9 5G nung 32-megapixel camera angutsü. Phone tesülen primary camera yagi 30fps nung 4K resolution video tem tangoktetter aser front camera yagi Full-HD video tangoktetter.

Tanga feature tsütsü reprangdangra, Oppo K9 5G nung Wi-Fi 5, 5G, Bluetooth, 3.5mm headphone jack aser

dual-SIM feature angutsü. Iba phone nung battery tasazük 4,300mAh alitsü aser 65W fast charging technology support asür.

Oppo K9 5G - 8GB +128GB storage variant jenjang CNY 1,899 (sen 21,600) aser 8GB + 256GB storage model jenjang CNY 2,199 (sen 25,000) alitsü.

## MULUNG NEN O



**ASOBA :**  
28.01.1966

**ASÜBA :**  
06.05.2021

Onoki kodanga amadoktsü makokba temeim ojala **Lt. T. Asenla Ao** (Chuchuyimlang). La anogo ishika shiranga lia May 6th 2021 iba akümlü wadang toktsür ogo. La shiranga aliba mapang nungi tanü tashi shirisa rongsen den ano kija aser kibongi sarasadem nung yaritepogo nenok ajak dang kanga sa pelar.

Onoki nenok dangi tsüngdong arua meshitetaka asen teyangluri nenok moajangma.

"Temeim Oja, tanü nai onok toktsür oaga, nü tamang sarasadem nüktzü, nü temeim mapa tajungtem aser nü menürem tejak onoki teti bilemteter aser item mapa tajungtem teti onoki benshitsü."

**Tatem nung nü Temeim kinungbo, chirnurtem, anükapang aser adianutem ajak nungi salem.**

## Wokha DPDB senden menogo

**Wokha, Monupii/May 10, 2021 (TYO):** Hombarnü (10.05.2021) DC conference hall, Wokha nung May atema ita shia ayonga agiba District Planning and Development Board (DPDB) senden agiogo. Vice Chairman DPDB & Deputy Commissioner, Wokha, Orenthung Lotha-i anir iba senden agia liasü, ta sangdong ajanga metetdaksü.

Iba senden nung MLA, Dr. Chumben Murry-i, Indian Postal Services ajanga District nung maparen inyakba indang nung asüngdangya liasü. Pai ashiba agi, e-commerce inyakyim takok ngua aoba asadanteta, home delivery service densema delivery service timi achaayangtsü nungdaker.

Nübur ajanzüktsü asoshi Indian Postal Services-i shilem tulu agütsü, ta Dr. Murry-i ashi.

Aspirational Block, Changpang dak sendakba nung, DC Orenthung Lotha-i, District-i Committee ka tentettsüogo, kong DC ji mendenbuba asütsü aser maparen balala achaayanga

inyaktsü asoshi committee-i Sorkar nungi tetuyubatem atadar, ta ashi.

CMO, Wokha, Dr.C.W. Tungoe-i, COVID-19 vaccination maparen indang metetdaksüba mapang, pai, May 2021 tashi Wokha district atema yokba vaccine 20,780 nungi nisung 15,186 nem iba vaccine agütsüogo, ta ashi.

M.S Wokha, Dr. Tumchobeni-ia, District hospital Wokha indang jenjang aser inyakyimtem telok dang metetdaksü.

DC-isa, Wokha district atema COVID-19 War Room amenokogo aser emergency atema ph.no 9863663885 nung mesüra Wokha WarRoom@gmail.com ajanga tongteprateptsü akok, ta metetdaksü.

Maneni, kasa senden nung züngsem tasentem - BDO Sanis, R. Thungchamo Ovung aser EAC Baghty, P. Sangtam nunger Board nung aniokba telok dang metetpeladaksü aser teloki parnok pelashishia agizük, ta kasa sangdong nung shia lir.



Wokha, Monupii/May 10, 2021: Honibarnü (08.05.2021) Food & Civil Supplies Department, Wokha indang office nung DC Wokha, Orenthung Lotha aser tanga ketdangsürtemi Pradhan Mantra Garib Kalyan Anna Yojana (PMGKA Y)-III lapoktsüba mapang tangokba noksa ka yangi angur.



## Zverev-i Madrid Open tanabenbuba kokogo

**Monupii/May 10, 2021 (Agencies):** Alexander Zverev-i tawa kanga junga asayaa arudar aser maneni Deobarnü Madrid Open final asaya nunga kanga junga asayaa iba asayamung kokogo.

Quarterfinals nung top seed asayar Rafael Nadal aser semifinal nung Dominic Thiem akokba sülen final asaya nung Zverev-i, 6-7 (8), 6-4, 6-3 agi Matteo Berrettini koka iba season nung tanabuba asayamung koktetogo. Zverev-isa, March ita Acapulco nung Mexican Open kokogo.

Zverev-i Madrid Open mezüngbuba 2018 küm akok. Iba küm pai final nung Thiem tsüngdaksü. Deobarnü takok anguba sülen pai Masters 1000 title pezübuba kokogo koba küm asem tsüngda mezüngbuba takok asütsü. Tang pa French Open nung junga asayatetsü atema renemshi tenzüksü.

"French Open nung junga asayatsü atema clay court season nung junga asayatsü nüngdaker. Ibaji kü atemaa kanga tongtibang. Ni iba takok ngutetba atema kanga pelar, aser taruba hopta ishika atema kanga yongyaa atar" ta arishi

küm 24 tain Zverev-i asaya akokba sülen ashi.

Kasa mapang nung jenjang 10buba nung aliba asayar Berrettini-i taoba hopta Belgrade nung asayamung kokogo. Italy nung asayar ya tepok yiruba sülen Australian Open nung Stefanos Tsitsipas den quarterfinal masayatetsüsa aküm aser iba ajanga pa Monte Carlo asayamung matong tashi masayatet, kong pa mezüngbuba asaya nung tsükatok.

"Iba ya ni atema mezüngbuba Masters 1000 final liasü aser tatemangbuba masütsü imlaa atar. Ajisüaka ni taoba mapang ashiba ama ni tang asayaba yimya dak kanga temulung asür. Tanü tia maka ni bilemba ama junga masayatet," ta Berrettini-i ashi.

Mezüngbuba set nung game kaka break sütepba sülen tiebreaker nung Berrettini 5-0 agi tejakdang ser tenzük saka Zverev nem menepdaksü. Ajisüaka pai set point pezübuba nung asaya akok. Iba tamakok ya Zverev asoshi hopta tsüngda mezüngbuba tamakok liasü.

Tanabuba set asaya nung game 4-4 koker aliba mapang Zverev-i Berrettini indang serve

break süa tanabuba set akok. Madrid nung tzünglu aruba ajanga Magic Box center court kilem shibanger final asayaa liasü.

Berrettini, shibai asaya tepeyong nung unforced errors 50 menaa liasü, pai tasembuba set nung asaya tetenzüklen serve break asütsü asoshi maangka angu saka break mesütetba sülen Zverev-i pa indang serve break süa pa tejakdang aküm. Zverev-isa asaya tatemlen Berrettini indang serve ka break süa asaya akok.

Kasa asayamung tebur tarep asaya final nung Spain nung Marcel Granollers aser Argentina nung Horacio Zeballos nati 1-6, 6-3, 10-8 agi Croatia nung Nikola Pietrangeli aser Mate Pavic na kokogo.

Wara poktetet külen Spain nung tang mezüngbuba terpranger kar asaya repringtsü asoshi arudakja Madrid Open asayaago. Taoba küm Coronavirus poktetba ajanga asayamung aika athiba rongnung iba asayamung yaa densema liasü. Deobarnü final masaya tsüngda asayamung ayongzükertemi local health workers tem nem akhüm tetushi agütsüogo.

## Football asayar tejen Fortunato Franco süogo

**Monupii/May 10, 2021 (Agencies):** 1962 küm Asian Games nung gold medal akokba team nung züngoksema alisang Fortunato Franco Hombarnü süogo. AIFF-i pa asüba osang jangjatsüogo, ajisüaka pa kechi agi asü, iba indang osang tejangja magütsü. Pa arishi küm 84 liasü.

Franco-i kinungtsü aser jala jabasotem toktsür iba lima nungi pilaaogo.

India nung rongnung mid-fielders (half-back as per 1960s parlance) tajungtiba rongnung Franco-a ka liasü aser pa 1960-64 tsüngda Indian football golden era nung shilem ka liasü.

Pa 1960 Rome Olympics squad nunga densema liasü, saka asaya ka nung dang shilem magi, ajisüaka Jakarta nung 1962 küm Asiad nung gold medal akokba team nung pai tongtibang shilem agi.

Pai India tenüng nungi 26 ben asayaago, kong 1962 Asian Cup densema lir. Iba asayamung nung India team tanabuba jenjang nung tembang. Maneni pa 1964 aser 1965 küm Merdeka Cup nung silver aser bronze anguba team nung densema liasü.

Ajisüaka pai 1962 Asian Games nung tajungtiba asaya. Iba asayamung final nung India team-i goal 2-1 agi South Korea koka liasü. Final asaya ya Jakarta nung asaya aser nisung 100,000-i repringa liasü.

Iba asayamung nung PK Banerjee, Chuni Goswami, Tulsidas Balaram aser Jarnail Singh nung kanga nungtugu aküm saka Franco-i Jarnail nem ball agüja goal idaktsüba ajanga asayamung akokba teti bilemtetsü.

Domestic jenjang nung Franco, mapang talangba ka Mumbai nung Tata Football Club nungi asaya. Pa iba company nung Public Relations department nung küm 40 inyaker 1999 küm mapa nungi anen.

Maharashtra nung football asaya nung pa nungtugutiba asütsü ta amanger, shibai 1959 nungi 1966 kuma tashi küm ti atonga Santosh Trophy nung state team anir asaya aser 1964 küm pa lenisüba nung parnoki asayamung akok.

Football asaya tatemang kati aruba mapang pa Salgaocar nungi asaya, saka temekok yiruba ajanga pa arishi küm 30 majung dang

asaya nungi anentsüsa aküm.

1965 küm Franco international football asaya nungi anener mali asübo pa lenisüba nung India team 1966 Asian Games nung asayar lila ta asayar tejentem aikati bilemer.

"Fortunato Franco asüba osang angashiba ya tesasatsüka. Pa Indian football golden generation nung züngsem ka liasü, shibai 1962 küm Asian Games nung India team-i gold medal anguba nung teyari tulu agüja liasü," ta AIFF tir Patel-i ashi.

"Pai Indian Football atema inyaka toktsüba kodanga mamatoktsü. Ni mang ayimer," ta pai ashi.

Kasa mapang nung AIFF general secretary Kushal Das-i, "Fortunato Franco-i ajangtetbatem teti taküm alitsü. 1962 Asian Games nung India-i gold medal anguba nung pai kanga dang tongtibang shilem agiogo," ta ashi

"Pa ya nungtugu football asayar ka lir, shibai putu aika ajungmesogo. Par kinungertem den ni asükhulemsateper. Pa tanüla tesunep nung anisüngzükdakjang ta sarasademtsür," ta paisa shisem.

## Babar & Healy nem ICC players of the month naroküm agütsüogo

**Monupii/May 10, 2021 (Agencies):** Pakistan captain Babar Azam aser Australia tetsür team wicketkeeper Alyssa Healy na nem Hombarnü April ita atema ICC players of the month naroküm agütsüogo.

South Africa den asayaba mapang formats ajak nung kanga junga asayaba sülen Azam nem iba naroküm agütsüogo aser fan o ICC voting academy-i April ita atema pa asayartem rongnung tajungtiba ta shimogo.

South Africa den tasembuba ODI asaya nung pai ball 82 nung run 94 yangluba sülen rating points 13 ngua ajak senteper point 865 angu, koba pa indang career nung tang tashi nung point timtiba ngutetba asütsü.

Paisa, T20 asaya tasembuba nung ball 59 nung

run 122 yanglua Pakistan-i South Africa akokba nung teyari agütsü.

Kasa mapang nung Southern Stars nungi asayar Healy-i, tawa tembangba New Zealand den asaya nung kanga junga shilem agiba sülen langa aliba ama iba naroküm nguogo.

New Zealand den ODI asaya asem nung Healy-i, average 51.66 aser strike rate 98.72 nung run 155 yanglu. Australia akokba asayamung nung lai asayartem ajak rongnung run timtiba yanglua liasü.

Healy asayaba yimya tenüngsang ICC Voting Academy nungi Ian Bishop-i, "ICC Women's Player of the Month angutsü Healy langa liasü. Lai asaya ajak nung Australia atema run aika yangluja teami takok anguba nung teyari tulu agütsüogo," ta ashi.

## Japan nung shilem 60-i Olympics masayadaksüner

**Monupii/May 10, 2021 (Agencies):** Olympics asayatsü ita asem shi dang anunga aliba mapang ka nung Japan nung shilem 60 shi-i Tokyo Olympics masayadaksüner, ta Hombarnü opinion poll ka ajanga sayuogo.

Japan sorkari Tokyo nung state of emergency May ita tatemang tashi atsülangtsüogo aser COVID-19 tashidak azüoktsü atema kanga timtema arudar. Iba ajanga asayamung ayongzüka asayatsü masayatsü mejangjai kümdaktsüogo.

2020 Olympics, koba coronavirus wara poktetba ajanga küm ka agi thinena liasü, iba asayamung ya July 23 nü tenzüksü renema lir.

Yomiuri Shimbun daily-i May 7 nungi 9 nü tashi bushitsüngdang agiba sülen Japan nung shilem 59-i iba asayamung masayadaksünüba ngutetogo aser shilem 39-i iba asayamung ayongzüka asayatsü ta ashir. Asayamung thinentsü atema kecha benoka sensak masem.

Olympics ayongzüka asayatsü ta ashirtem rongnung shilem 23-i, terpranger medeni asayatsü ta ashir. Bendangertem asayamung repringi marudaktsütsü telemtetba agiogo, saka Japan nungertem dak sendakba nung June ita

telemtetba agütsü.

TBS News-i hopta tatemanga bushitsüngdanga ka agiba sülen Japan nung shilem 65-i asayamung masayatsü mesera thinentsü jangraba ngutetogo. Parnok rongnung shilem 37-i asayamung masayadaksüner aser shilem 28-i asayamung thinendaksüner.

Ibala mesükba bushitsüngdang ka April ita Kyodo news agency-i ayongzüka agi aser bushitsüngdang nung shilem agir shilem 70-i asayamung masayatsü mesera thinentsü jangraba ngutetogo.

Tongtibang Olympic ketdangtsür John Coates-i Honibarnü ashiba agi, Japan nungertem shisabulua bilemba ya tebilemtsüka saka iba asayamung thinentsüsa kecha tetsükdaktsü merprangteter ta ashi.

Kasa mapang nung Japan Ato Kilonser Yoshihide Sugaia, COVID-19 tashidak menar tali kümaka Olympics kechi südir süaka asayatsü ta shia arudar, saka TBS survey ajanga pa pusemertem shilem 40 dang aliba ngutetogo.

Deobarnü Japan nung tennis asayar Naomi Osaka-i, la Olympics nung asayatsü atema taküm tepeyong ataa liaka Tokyo Games ayongzüka asayatsü aliba dak lendong keta alibatem kanga junga sensak asemtsüla ta ashi

## BILEMDANGANG

"Tangar asoshi süoki ia magiba nisung kati lendong bener arutsür."